

# MARVA BINNEBISTE SJUN

Teksdichter **Edwin Peelen**  
Toeëndichter **Edwin Peelen**  
Oetveurend arties **45èlf**  
Arrangement **Michel Nita**  
Ópnametechniek **Marlstone Music**

[intro]

*"Sjpiegelke, sjpiegelke zaag mich gewis...  
...weë 't sjunste va Limburg is?"*

[koeplet ee]

De flanke vöal te rónk en nit bepoald ee tópmoed.  
Al joare óntevreie mit d'r kóp en 't gesjtel.  
'Tis nit dat me va dich d'r boek vazelf vol vlied're kriet.  
En zieëker went me dich doabei in 't kloare daagleeg ziet.  
Dieng oere vange wink. Doe hast ee moelwerk wie ing tang.  
Nóg noeëts ins noagefloate. Vuur d'r sjpiegel biste bang.  
Die vel is gans geknoeveld. Dieng fundering is verzakt.  
D'r Hergod had besjlis geweun die lief verkieëd verpakt.  
Dieng tendjes sjtónnd get gek. Aa vouwe gee gebrek.

[refring]

Mar... va... binne, binne, binne biste sjun.  
Biste te lank, te breed, te kót of vöalste dun.  
De lújd die moele mar. Dus loester noe nit mieë.  
Wieste va binne bis dat kin me ja nit zieë.  
Al deed de boetezie dich leed, dat is 't nit woar ut um geet...  
Dus dink: "Va binne, binne, binne bin ich sjun".

[koeplet twieë]

En kiekste mit de oge noa 't puntje van dieng naas.  
Of biste op dieet en weësj de kilo's nit d'r baas.  
Dieng bóksj begint te knelle en bukke geet nit mieë.  
en hast doa durch al joare nit die óngersjtel gezieë.  
Va kinks aaf aa al platveut. Dieng pruuk hat nit mieë kluur.  
Doe wilt waal ins get angesj wie die heutjes vuur dieng duur.  
Zoeë mager wie ing ledder. Ing pütsj, dat zieste zoeë...  
Doa kin d'r allerbetste sjpecialis nieks mieë aa doeë.  
D'r haos deë hingt get sjlap. Hast boavebing wie pap.

[refring]

[tusjesjtuk]

Kom maak dich nit zoeë diek; doarom ver lees noe nit d'r mood.  
Ich geëf dich inne road dus loester good:  
"Gekloemel an dich zelve dat is hütse daags gans hip...  
't Vet vanoet de batse dich te sjprietse in de lip."

[refring] [gesjproake in 't refring]

*Wenste dat mar wits...*

*...of doe hast inne poekel, sjeeft tieëne, dieke kneie, ee naksj  
gezicht, inne platekóp of inne bölles wie ing tröat.  
Me is ja egelik noeëts tevreie.*

[refring]

Dus dink: "Va binne, binne, binne bin ich sjun".  
Noe roop: "Va bin-ne, bin-ne, bin-ne zint vier sjun".